

La ARLeF e lance la gnove campagne a supuart de sielte dal furlan a scuele pai propriis fîs

Intal 2019 lu à sielzût passe il 76% dai gjenitôrs. Si à timp fin ai 31 di Zenâr dal 2020.

Zenâr al è il mês che si notin i fruts a scuele e al è ancje il moment par domandâ l'insegnament de lenghe furlane pai propriis fîs e garantîur cussì ducj i vantaçs di une educazion plurilengâl.

Propit par chest, la ARLeF - Agenzie Regionâl pe Lenghe Furlane in chescj dîs e à lançade la campagne di informazion e di sensibilizazion "Dîs di sî al furlan a scuele par to fil", par supuartâ la sielte cussiente dal plurilinguism in etât di scuele. Il tiermin pe iscrizion fissât dal Miur al è ai 31 di Zenâr dal 2020. La sielte dal furlan si fâs tal moment de iscrizion in rê a ogni cicli scolastic, midiant dal portâl <http://www.iscrizioni.istruzione.it/>, ma i gjenitôrs a puedin fâ riferiment ancje ae segretarie de scuele par vê plui informazions.

La campagne promoziônâl de ARLeF, ative par dut il mês di Zenâr su cjarte e in rê, e sarâ amplificade midiant dai profîi Facebook e Instagram de Agenzie, e supuartade di un simpatic video *motion graphic*, disponibil sul sît www.arlef.it inte version par furlan e par talian.

"Pes scuclis de infanzie, primariis e secondariis di prin grât – al ricuarde il president Eros Cisilino - tal moment de iscrizion i gjenitôrs a son clamâts a fâ sieltis educativis che si trasmetin in mût positif sul percors di cressite dai lôr fîs. Midiant di cheste gnove campagne, la Agenzie e vûl rimarcâ che meti i fruts intes cundizions di imparâ il furlan a scuele nol vûl dî rinunziâ a altris lenghis, tant che chê inglese, ma permetiur di imparâlis miôr e prime, cemût che a dimostrin lis ricercjis sientifichis plui avanzadis sul plurilinguism. Fevelâ par furlan ai propriis fîs al vûl dî, cun di plui, passâur il sens di apartignince ae comunitât furlane, lassâ un tesaur fat di une culture milenarie, di savê e tradizions, dant valôr ae storie, ae gjeografie e ae culture dal teritori là che a vivin, ma usantju ae esplorazion dal mont."

Il furlan - il dât al è a pene stât confermât - al è stât sielzût tal 2019 di passe il 76% dai gjenitôrs, cussients che la didatiche plurilengâl e sigure tancj vantaçs cognitîfs. L'insegnament de lenghe furlane al facilite apont l'aprendiment di altris lenghis tant che chê inglese, al fâs cressi la capacitât di concentracion e di risoluzion dai problemis, al jude i fruts a imparâ a lei prime, al ritarde il declin cognitîf parcè che al manten il cerviel zovin e elastic. In tantis scuclis, l'insegnament al ven fat daûr di chê che a nivel european e je ricognossude tant che une des metodologiis didatichis plui zovevulis, o ben il CLIL (Insegnament Integrât di Lenghe e Contignût). Il furlan, che intal 2019 al è stât insegnât par almancul 30 oris totâls a 38.000 arlêfs des scuclis de infanzie, primariis e secondariis di prin grât, nol gjave in nissun mût oris a altris materiis e si inserîs intal 20% dal curriculum individuât in autonomie des scuclis, daûr di ce che al è previodût de Leç statâl n. 482/99 e de Leç regionâl n. 29/2007. I insegnants, increditâts de Regjon F-VJ, a son plui di 1.500.

Udin, ai 9 di Zenâr dal 2020

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / e-mail: arlef@caltpr.it

Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<